



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

**Keir Starmer-i UK ato
kilonser menden yutsür**

**Serena Williams Wimbledon
tetsür kija asaya asayatsü**



VOL. XXIII ISSUE NO. 250 (ADOK 250) DIMAPUR SANGTENNÜ (TUESDAY) AAMI (JUNE) 23, 2026

₹ 5.00

ILRC-i non-local teloktem den ajuruteptsü

Dimapur, June 22, 2026 (TYO): Naga Students' Federation (NSF) nung Inner Line Regulation Commission (ILRC) ajanga Dimapur nung Inner Line Regulation (ILR) atema senden ka amentsü ayongzükter.

Iba senden ya June 27, 2026 anepdang 11:00 ako nungi Hotel Grand Vista, Walford Colony, Dimapur nung alitsü aser non-local organizations, associations, unions, welfare bodies aser stakeholder groups ajak adentsü jaoker ta ILRC-i metetdaksüogo.

ILRC-i Nagaland nung Inner Line Regulation mapa tenzüksü

dak sendakba nung non-local pur den asüngdangyatsü aser parnok tebilembatem angadangsü atema iba senden ayongzükter.

Teloktemi iba senden nung adentsü aser tebilembatem lemsateptsü ayongzükter. Iba senden nung bendenba onüktem Commission-i agizüka mapa akümtsü ta ILRC-i metetdaksüogo.

June 25, 2026 matongdang teloktemi Commission nem senden nung adentsü osang agütsütsü mepishir aser iba asoshi Member Secretary, ILRC Mobile: +91 8413899928 den tongteptsü mepishir ta parnokisa metetdaksüogo.

CoTU-i highway ana mokdangba agiener

Imphal, June 22, 2026 (Agencies): Sorkar ketdangsürtemi tenangzükba agiba sülen Committee on Tribal Unity (CoTU)-i Manipur nung national highways mokdangba agienero.

CoTU-i National Highway-2 aser National Highway-37 nung emergency blockade salar ta metetdaksü.

NH-37 nung New Keithelmanbi tesem nung lungkak aitertemi security forces den mangatetep adoka raradang nisung asem kanga mejungi yirua liasü aser iba tatalokba sülen mapang tatsüka lir CoTU-i iba osang metetdaksü.

Iba tesem nung CRPF personnel-i lungkak aitertem senshidaksütsü atema tear gas shells aser mock bombs amshia liasü aser lenmang lapok. Iba ajanga Jiribam adena Imphal aser Silchar tsüngda heavy escort-i meina khu abenba garitem senzüksü tenzükogo.

Leimakhong-Kangchup

areas nung Kuki-Zo nung dak dang rangloker security operations inyaker ta tai tonglokja CoTU-i highway ana nung emergency blockade asüba sangdonga liasü.

Superintendent of Police, Kangpokpi district-i tenangzükba agiba atema tangatetba tajung nung mokdang agiener ta CoTU-i ashi.

Kangpokpi district nung Kuki-Zo yimtsüngtem aser sensotem kümzüka ayutsüba tebilemtsü khuretji Superintendent of Police, Kangpokpi-i abentsü. Tesem balala nung village volunteers mapa lemzüka aliba meyipa agir ta CoTU-isa ashi.

Ajisüaka parnoki maparen nung tenük yoka repringtsü aser ketdangpurtemi nangzükba ama meinyakra ozüngi melaba ama tapet mapatem inyaksü ta CoTU-isa metetdaksüogo.

CoTU-isa pastor asem aser Kuki-Zo civilians 11 tepsetba atema temeten meshiba nenshiogo.

Guwahati nungi UAE den indangindanga sendakteptsü

Guwahati, June 22, 2026 (Agencies): Air India-i August 4 nungi Guwahati nungi Dubai aser Abu Dhabi tashi direct flights tenzüksü ta Chief Minister Himanta Biswa Sarma-i ashi.

"Item non-stop services ajanga Assam-i international connectivity akangshitsü aser Guwahati ya regional travel hub ka akümtsü" ta Sarma-i metetdaksü.

Lokpriya Gopinath Bordoloi International Airport (LGBIA) nungi UAE yimti ana den sendaktepba züngsema linük pezü den direct links akümer. LGBIA nungi indangindanga sendaktepba linüktemji- United Arab Emirates, Thailand, Singapore aser Bhutan lir.

State sorkarisa Vietnam den

indangindanga air connectivity sendakteptsü atema mapa inyakdar ta Sarma-isa ashi.

European Union member states-i parnok sensotem asoshi Assam-i travel advisories meyipa repringshiba aser restrictive guidance agienba sülen CM Sarma-i iba osang metetdaksü.

EU ketdangsürtemi tawa Assam semdangba ajanga Assam o European linüktem tsüngda tourism, business ties aser people-to-people exchanges tashi itshitsü ta pai ashi.

Paisa European Union Ambassador to India Hervé Delphin aser European Union to India teshimtet telok dang Assam nungita yariba atema pelaba shisem.

TMC nung temulung masürtemi Chairperson tasen ka shim

New Delhi, June 22, 2026 (Agencies): Trinamool Congress (TMC) nung temulung masüba teloki party chairperson nungi Mamata Banerjee agienba aser lenisür tasentem shimba osang metetdaksüogo.

TMC MLA aser züngsem aikati onok pusemer ta Leader of the Opposition Ritabrata Banerjee-i aniba teloki ashi.

Taoba Kolkata mayor Firhad Hakim densema Mamata Banerjee den tesentaktep tajung alir aika parnok den denogo ta Ritabrata Banerjee-i aniba teloki ashir.

Hombarnü West Bengal Assembly nung BJP-i mezüngbuba budget benokba anogo nung iba osang metetdaksüogo. Assembly session agiba sülen temulung masüba Trinamool MLA tem five-star hotel ka nung senden amen.

Iba Special Session nung tang teinyakdak aser tesüba MLA tem, district presidents, aser councilors densema Trinamool

lennir 500 shi aden.

Iba senden amenba sülen parnoki züngsem 30 agi akümiba National Working Committee tentetba osang metetdaksü. Iba ya chichiba Trinamool Congress lir ta parnokisa ashi.

Temulung masüba teloki 1998 küm Mamata Banerjee-i tentetba telok azüoktsü meranger. Parnoki chairperson inyaksü atema MLA Arup Roy shimtetogo.

Iba lenisüba menden nung Firhad Hakim, Aroop Biswas, Rathin Ghosh aser Sabina Yasmin nung vice presidents, Ritabrata Banerjee, Javed Khan aser Sandipan Saha nung general secretaries aser Akhruzzaman Ansari treasurer ama shimogo.

"TMC lennirtem aser züngsemtem indang special session nung party chairperson inyaksü atema ajaki mulunga Arup Roy shimogo" ta Ritabrata Banerjee-i ashi.

"Iba ya chichiba mesüra

tiyazü indang masü. Onok TMC lir aser Election Commission dang tanü special session osang sangoktsütsü. Inyakyim lateta aliba onoki mapa inyakogo aser iba special session jazüka agi. EC-i kechi tai mesüra shitak lemtettsüla. Onoki yakta district committees, state unit aser panel of spokespersons shimtsü" ta paisa ashi.

"Mamata Banerjee-i chief advisor inyaknürä, onoki pelashishia agizüksü" ta Ritabrata Banerjee-isa shisem.

Temulung masüba teloki iba mapa inyakdang official Trinamool lenisübai lennir aika anema disciplinary proceedings tenzükogo.

TMC disciplinary committee-i Firhad Hakim, Aroop Biswas, Arup Roy, Javed Khan, Rathin Ghosh, Biplab Mitra, Snehasis Chakraborty, Sabina Yasmin aser tanga lennirtem dangi party anema inyakba atema show-cause notices agütsüogo.

Manipur nung summer vacation hopta ka dang agütsür

Imphal, June 22, 2026 (Agencies): Manipur nung tensa mejungi aruba agi school tem academic time akoksaba atema summer vacation hopta ka dang agütsütsü ta Chief Minister Yumnam Khemchand Singh-i metetdaksüogo.

Chief Minister Khemchand-i anogo asemnü "Reforms in School Education of Manipur: An Approach to Implementation, Challenges and Opportunities of NEP-2020" workshop

tenzüksüba sentong nung iba osang metetdaksü.

Iba sentong ya Vidya Bharati Shiksha Vikash Samiti, Manipur ajanga City Convention Centre, Imphal nung ayonga agir.

"Tronglaobi lendong atalokba sülen ita ka jungnüa shisaliok rejutem aser sorkar office tem ketdangsüba nung timtem ajurua liasü" ta CM Khemchand-i ashi.

April 7, 2026 nü Bishnupur district kübok Tronglaobi

yimtsüng nung anepdang 1:00 ako meta bomb amshia amakdang tanur ana tepsetba den tanur tetsü kanga mejungi yirua liasü.

Manipur Chief Minister-isa sorkar department ajaki mapang akoksaba meyipa angutsü atema Honibar ajak 'working days' asütsü ta metetdaksü.

Sorkar mapa anendaka aliba ajak tembangba sülen akhi ama Honibar anogotem sodi asütsü ta Chief Minister Khemchand-isa ashi.

Nagaland House, New Delhi nung kitsükkirong lendong ka atalok



Dimapur, June 22, 2026 (TYO): June 22, 2026 nü Dr. A.P.J. Abdul Kalam Road, New Delhi nung aliba Nagaland House nung kitsükkirong lendong ka atalok.

Iba lendong ya Room No. 2 nung atalok aser air-conditioning unit ka nung electrical short circuit ajanga adok asütsü ta bilemer. Ajisüaka guest house nung staff kanga jeretpera aliba agi fire extinguishers amshia miji

tangalen kaoloka meyoki azüokteta alidang Delhi Fire Service arua mi ensep.

Nagaland House nung staff aser anameta aliba office nung inyakerteri extinguishers amshia mi azüoktsü merang aser mi tulu küma aodang parnok kilemi tur tesülen kichibalen nungi azüoktsü merang ta ketdangsürtemi ashi.

Tatem nung Delhi Fire Service arua miji ensep aser Tsüngrem tauchi agi iba lendong

nung nisung asüba mesüra yiruyibong asüba maliasü ta ketdangsürtemi ashi.


Joint Resident Commissioner, Sharon Longchari, NCS-i anir emergency response aser post-incident management ketdangsüa inyak aser state sorkar ketdangsürtemi takoksa anguba aser kiojen dak kongshiba asadangdar.

Nagaland House ya 1973 nung taoba Chief Minister Dr. Hokeshe Sema-i lapoktsü aser küm tenem tema New Delhi nung Nagaland asoshi kanga dang tongtipang teyari angudak ka ama arur.

Nagaland House ya Lutyens' Delhi nung Prime Minister'er ki anasa lir aser Naga nung asoshi "home away from home" ama züngshir.

State sorkari iba kiojen tejen ya modern facility ka agi melenzüksü sentong renema lir.

Byatikram Education Conclave 9.0 nung Angh aden



Dimapur, Aami/June 22 (TYO): Dimapur nung June 22, 2026 nü Byatikram Education Conclave 9.0 alidak Nagaland Angh Nand Kishore Yadav dena liasü.

Educationists, academicians, principals, tesayur aser kaketshirtem den iba sentong nung jembidang, temelenshi asoshi shisaliok ya tashi tulutiba hadir ka lir aser India nunger Viksit Bharat 2047 mangdang nung tongtipang shilem agir, ta Angh-i ashi.

Linük indang education

system ajanga tarutsü nung tayongzükbatem koktettsü aser maongka anguba nung lirumedema litettsüsa lanurtem nem shisatsü aser skills agütsütsüla, ta ashi.

National Education Policy (NEP) 2020 athishia jembidang, iba policy yagi 'multidisciplinary learning, critical thinking, innovation and skill development' ajanga shisaliok tejakleni aotsü atema lenmang tajung agütsür, ta ashi.

Artificial Intelligence putu ka nung aser technology tejakleni

kanga kera aoba mapang kaketshirtem arishi tepiyong angazüker, mapatong tasen putiteter aser senso tajung kumdaktsütsüla.

Shisaliok yagi lanurtem mapa bushiba nung kisung masü saka maongka yanglur aser lokti terenlok nung shilem agir kumdaktsütsüla, ta pai ashi.

Pai tesayurtem nem akhum agüja jembidang parnok ya linük yanglur chichiba lir ta ashi aser kaketshirtem nem takok tajung ngutetba atema tenüngsang agüja liasü.

NEZCC-i documentation mapa atema application meshir

Dimapur, Aami/June 22 (TYO): North East Zone Cultural Centre, Dimapur kübok Folk & Tribal Music & Dances and Vanishing Art Forms of North East (Arunachal Pradesh, Assam, Manipur, Meghalaya, Mizoram, Nagaland, Sikkim & Tripura) nung research-oriented documentation (2025-2026) mapa inyaknüa aliba Scholars tejangja nungi application meshir, ta North East Zone Cultural Centre, Ministry of

Culture, Government of India sangdong ka ajanga ashi.

Applicants ya India senso asütsüla aser pei State indang lisopur asütsüla. Project proposals shimtsü mapa ya NEZCC-i tentetba Panel of Experts temi inyaktsü.

Application Forms aser tanga tejangja osang pei States sorkari indang Directorate of Art & Culture/Cultural Affairs office mesüra Shilpgram, Panjabari, Guwahati aser NEZCC Head Office,

Dimapur nungi meshitetsü.

Form tem ya NEZCC indang website <https://nezccdimapur.org.in> aser <https://www.facebook.com/NEZCC> nunga lir.

Applicaction ya August 31, 2026 tashinung agütsütsüla aser iba sülen agütsüba magizüktsü.

Kuli kecha magütsüi applications magizüktsü mesüra agizüktsü Director, NEZCC dak tashi lir, ta sangdong ajangasa ashi.

DIPR nung photography aser videography training tenzükogo



DIPR nung photography aser videography training agiba mapang ttangokba noksa angur.

Dimapur, Aami/June 22 (TYO): Department of Information & Public Relations (DIPR) ajanga yangji interns tem asoshi anogo asem Photography and Videography Training Programme ka Directorate Conference Hall nung June 22, 2026 nü tenzükogo.

Training ya June 24, 2026 tashi alitsü, koba kaketshir nem visual storytelling aser digital media production nung practical skills agütsütsü nükjidong nung ayongzüka alitsü.

Vocational aser skill-based education tali tongtipang

akumba ajiteta Department-i interns nem photography aser videography tsütsü training tajung agütsütsüsa iba sentong ya renem.

Theory aser practical meyoktepa agütsütettsüsa sentong ya renema lir, anungji shilem agirtemi camera amshiba, visual content yangluba, noksa aser video tangokba aser media documentation angatetsü.

Iba training nung camera operations, framing and composition, lighting techniques, photo and video documentation, visual storytelling, editing basics

aser media production yimya tem densema onük balala awajemtsü.

Demonstrations, field-oriented exercises aser sensaksem akaba ajanga interns temi pei technical aser creativity tashi tajungba kumdaktsütsü maongka angutsü.

State nung universities aser kaket reju balala nungi interns 16 den tanga state tem nungia kar iba training ya agitar.

Iba training nung shisalen sayur ya Department nung photographers aser videographers takoktet tem alitsü.

EDTC-i Free Anti-Rabies Vaccination Camp ayongzüksü

Dimapur, Aami/June 22 (TYO): East Dimapur Town Council (EDTC) ajanga Department of Animal Husbandry & Veterinary Services, Dimapur den lungjemer EDTC Office, Purana Bazar ISBT nung June 26, 2026 anepdang 9:00 ako nungi anüngdang 12:00 ako tashi Free Anti-Rabies Vaccination Camp ayongzüksü. Anungji iba jurisdiction nung kidang

metsüba shiruru kibur aser shiruru anepalur temi pei azü aser tanü tem vaccination agitsü atema anir arutsü ajungshir, koba ajanga rabies tashidak nungi kumzüktsü aser nübürtem aser shiruru anema alitsü, ta EDTC sangdong ka nung ashi.

Iba sentong nung nübürtemi amalitep akatsü aser shilem agitsü imlaa atar, ta sangdong ajangasa ashi.

78 buba LKM tenzükba anogo amung, HSLC nung alakteta takok angur tushi



Mokokchung, 22nd June (TYO): Langpangkong Kaketshir Mungdang tenzükür küm 78 ajungba nüngtem June 22 nü parnok headquarter Chuchuyimlang Town nung sentong tajung ka ayongzüka mungogo.

Iba sentong nung LKM tenteter rongnung asür L. Pangersowa Jamir nüngtem "Lt. L. Pangersowa Trust Award for Academic Excellence" senpet dena agütsü. Iba konang ya Langpangkong nunger shisaliruin nung tangar dang

alakteta takok angur nem tetushi agütsür aser taküm ibaji Unger tsür Kr. Imnayangla-i HSLC tatidang nung takok tajung ngutetba asoshi la nem kulikaket den sen agi senpettsü.

LKM ya June 22, 1948 nü tongtibangsa Langpangkong lanurtem rongnung shisaliruin aser lokti terenlok ajungkettsü nükjidong yur mangdang akar lenirtem lungjemer tenzükba par otsü ajanga angazüker. Iba sentong nung Ao Senden Tir, Marsanen Imsong tetushi tesemdang liasü.

Mokokchung & Dimapur DPDB senden ayonger

Dimapur, Aami/June 22 (TYO): Ita shia amenba Mokokchung District Planning & Development Board (DPDB) senden June 26, 2026 anüngdang 11:00 ako nungi tenzükka Deputy Commissioner, Mokokchung indang Conference Hall nung amentsü, ta Deputy Commissioner & Vice-Chairman DPDB, Mokokchung, Ajit Kumar Verma, IAS ajanga sangdong ka nung metetdaksüogo.

Anungji iba senden nung züngsem ajak medema arua adentsü ayongzüker, ta pai sangdong nung ashi.

Maneni Office of the District Planning Machinery, Dimapur ajanga sangdong ka nung, ita shia amenba District Planning & Development Board (DP&DB) senden June 2026 atema Deputy Commissioner, Dimapur indang Conference Hall nung June 24, 2026 anüngdang 11:00 ako nungi amentsü, ta metetdaksü.

Iba senden nung Board züngsem ajak medema arua adentsü mepishir, ta Deputy Commissioner and Vice Chairman, DPDB, Dr. Tinojongshi Chang, NCS ajanga sangdong nung ashi.



Hombarnü DB's Court, Meluri nung Supervisors aser Enumerators atema Census Training phase tanabuba agidang EAC Meluri & Charge Officer, Zuchibemo Ezung-i iba training nung shilem agirtem den jembidang tangokba noksa nung angur.



June 22, 2026 nū New Delhi nung Defence Minister Rajnath Singh aser Israel Ministry of Defence Director General, Amir Baram na senden amentsü lia tangokba noksa nung angur.

Lucknow nung aliba Coaching Centre ka arong; nisung 14 asü

Lucknow, Aami/June 22 (Agencies): Hombar nungongdang Uttar Pradesh yimtiba, Lucknow kübok Aliganj nung aliba coaching centre ka arongba lendong nung kaketshir 14 süogo.

Iba mi lendong nungi jenbutsi atema kaketshirtem aikati kidang nungjagi pongzuka liasü, ta tenük kuli alirtemi metetdaksü.

Iba lendong osang angazükba sülen Uttar Pradesh Deputy Chief Minister, Brajesh Pathak-i specialist doctor team ka aser ambulance trok iba tesem jagi yokba sülen pa-a iba tesem jagi tsüngdong ao.

Pathak-i X ajanga, "Yirua alirtem tekeraba nung taneptsü angutsü atema ni sarasademtsür," ta metetdaksü.

Osangbenertem den jembidang Pathak-i, "Onoki takdang ajak mita repringdar aser fire brigade sepaitemi washroom ajak mita repringdar. Kaketshirtem karbo tang tashi ki telung nungjagi madokteti lir. Sepaitemi parnok bushia kümzüksü merangdar," ta metetdaksü.

Paisa, "Tang tashi nung tanur 13 kümzuka parnok ajak hospital-i anir ogo. Takdang ajak nung mokozü lir, ajisüaka takdang ajak mita repringdar,"

ta metetdaksü. "Iba mi lendong ya ajungbena dang atalok. Tang tashi nungbo miji komaser tenzükar ni kecha memetet. Iba lendong nung yirurtem KGMC Trauma Centre-i yokogo," ta pai ashi. Paisa, "Ni kü nuk agi tasü mang 14 pronglaji nguogo," ta ashi.

Deputy CM-i, "Iba tatalokba ya jungjunga bushisingdangtsü atema tuyuogo. Principal Secretary (Home) aser DGP na dang iba tesemi arung ta tuyu aser kuli bushia tarutsü nungbo item ama tatalokba malitsü atema aibelener nem temerenshi tulu agüjang ta tuyuogo," ta metetdaksü.

Tenük kuli alir kati, "Kaketshir 7-8-i lendong nungi kümzüksü atema ki azüklen nungi pongzuka alu. Ajisüaka kaketshir 20-25 shibo telung nungjisa alitsü südi ta bilemer," ta metetdaksü.

Ano tangar kati, "Yangi library mesüra computer course institution ka lir. Onok iba tesem tonga aruba mapang nung kidang nungjagi mokozü adoka angu. Iba sülen onoki nisung trok kümzük. Mi tulu jangruba sülen nisung ka ki temalen nungjagi pongzuka aluba ajanga kanga mejungi yiruogo," ta metetdaksü.

'Viksit Bharat' atema Rajasthan-i yakbang shilem agir: CM Sharma

Jaipur, June 22 (Agencies): Hombar nung Rajasthan Chief Minister, Bhajanlal Sharma-i, 'Viksit Bharat 2047' ataloktsü atema Rajasthan-i yakbang shilem agia district sasep nung terenlok mapa inyaker, ta metetdaksü.

NITI Aayog züngsem Prof K V Raju jaoka 'district domestic product' asadanga senden amenba mapang nung Sharma-i, district shia maitsü aser ali rongsen balala lir, aser ibaji denji liromedema sorkari terenlok atema asalentong yanglua inyaker, ta metetdaksü.

Chief Minister-isa, industry, investment aser ketdangsubaren nung rangloker inyakba ajanga süngjang tajung tangtsüdar, ta metetdaksü.

Rajasthan nung startup 6,000 ajanga lanurtem nem mapa maongka agütsür aser mapa tasen apiteta inyaksü atema lenmang lapoktsür, ta pai metetdaksü.

NITI Aayog züngsem Prof K V Raju-ia, state sorkari meranga inyakba ajanga Rajasthan ya "achievers category" nung lir, ta shia tenüngsang agütsü.

Paisa, "Rajasthan-i tzü tajemtsü agütsüba aser yimtsüngtem nung terenlok mapa kanga junga inyakogo. State-i tourism, aluyimba, mining aser solar energy sectors nung junga inyaktettsüsa tashi lir," ta metetdaksü.

Chief minister-i, linük nung renewable energy adokdaksüba state tem rongnung Rajasthan densema

lir aser green energy sector nung investments aser tasen apiteta inyakba ajanga rongsenkettzüng jenjang tajungba kümdar, ta ashi.

Paisa, district sasep nung terenlok mapa inyakba, data apir asalentong yangluba, local enterprises tashi itshidaksüba, tasen apiteta inyakba, investment ajungkettsüba aser renewable energy ajanga Rajasthan ya terenlok state ka akümtsü aser 'Viksit Bharat 2047' mission nung state-i tongti shilem agitsü, ta metetdaksü.

Iba senden nung Chief Secretary V Srinivas den tongti ketdangsertem liasü. Iba dak alia divisional commissioners aser district collectors-a video conferencing ajanga iba senden nung aden.

Uddhav Thackeray-i aniba party nungi MP 6-i Shiv Sena nung aden

New Delhi, June 22 (Agencies): Shiv Sena (UBT) nungi Lok Sabha MP troki Maharashtra Deputy Chief Minister Eknath Shinde-i aniba Shiv Sena telok nung denogo.

Hombar nung Mumbai nung sentong ka nung MP trok jagi Shinde-i aniba Shiv Sena telok nung aden. Anogo pongu nü tejaklen ang New Delhi nung ayongzükba Shiv Sena (UBT) Parliamentary senden ka mena liasü, ajisüaka iba senden nungji Lok Sabha MP 3 dang aden.

Uddhav Thackeray-i aniba party toktsür Shinde-i aniba Shiv Sena nung adener Lok Sabha

MP temji : Sanjay Deshmukh (Yavatmal), Sanjay Jadhav (Parbhani), Sanjay Dina Patil (Mumbaj North East), Nagesh Patil-Ashtikar (Hingoli), Omprakash Rajenimbalkar (Dharashiv) aser Bhausahab Wakchaure (Shirdi) nunger lir.

2024 küm Lok Sabha election nung parnoki BJP aser Shiv Sena candidate tem madak takok ngua liasü. 2024 general elections nungji Maharashtra nung Shiv Sena (UBT)-i Lok Sabha menden 9 nung takok ngua liasü.

Osangbenertem den jembidang Shinde-i, "Item Lok

Sabha züngsemtemi tangbo chichiba Shiv Sena nung denogo, aser iba yaasür Balasaheb Thackeray tangatetba sülen anidakba lir. Küm pezü tejaklen ni telemetba tuluka agia liasü aser tangbo ni 'sixer' zükogo (MP troki pa den adenba)," ta metetdaksü.

"Asür Balasaheb Thackeray tangatetbatem kümzüksü atema tamalen ni inyaka liasü (2022 küm June ita nung Shiv Sena telok ana küma lemsaba). Tang iba ya Shiv Sena ulushiba lir. 'Operation Tiger' tembangogo aser takok nguogo," ta Shinde-i ashi.



Chennai, June 22, 2026: Hombar nung Tamil Nadu state assembly nung opposition lenir aser DMK MLA, Udhayanidhi Stalin-i jembidang tangokba noksa

WB nung BJP-i mezü ng budget benok

Kolkata, Aami/June 22 (Agencies): Hombar nung West Bengal assembly nung BJP sorkari tang mezü ng budget benokogo. Budget benokdang Finance Minister Swapan Dasgupta-i, sorkar tasenbai taoba TMC sorkar ket nungi sentsüh 8.15 lakh crore agizüka liasü, ta metetdaksü.

Paisa, "Ochimashi maliba ketdangsubaren amenoktsüji onok tongti nukjijong lir. Yimsüsüba tsütsü nüburtemi tanaben tamang katettsüsa onoki inyaksüla," ta metetdaksü.

Dasgupta-isa, October 1 nungi state sorkar mapa inyakerem atema dearness allowance aser pensioner tem atema dearness relief '20 percentage points' tutsütsü, aser ibaji ajanga DA ji shilem 38 akümtsü, ta metetdaksü.

Finance minister-isa, Viksit Bharat mangdang nung rangloker Bengal nung tanü putu den apet terenlok aser tejakleni aotsü nukjijong nung iba budget renem, ta ashi.

Dasgupta-i, sorkar department balala nung mapa tazü ng lakh 1 atema shilem lemsar mapa nung shimoktsü, aser iba nungji police department nung mapa 20,000 aser school nung tesayur aser staff mapa 50,000 densema lir, ta metetdaksü.

Paisa, mapa shilem 33 bo tetsürtem nem agütsütsü aser mapa shilem 10 Agniveers

sepaitem nem wazüka yutsütsü, ta metetdaksü.

Opposition-i, BJP sorkar kübok welfare schemes aika agienadoktsü ta aitsüba dak sendakba nung Dasgupta-i, tang aliba social welfare programmes ajak maneni benoktsü, ta ashi.

Budget nung Annapurna Yojana scheme atema sen crore 36,000 lemzüksü aser tetsürtem bus nung angati senzüdaksütsü atema sen crore 550 lemzüksü.

Ano mapa mangurtem nem senotsü teyari agütsütsü atema 'Bharosa' sangdong. Iba scheme kübok küm ka nung sen lakh 1 den ishiba anguba kibongtem nem ita shia sen 3,000 teyari agütsütsü aser zünger mapa mangurtem nem ita shia sen 2,000 agütsütsü.

Iba dak alia MLA Local Area Development Fund kübok sen lakh 70 agüja aliba nungi sen crore 1 kümtsüogo.

Mapa nungi anisüngzüker alir journalist tem nem ita shia pension sen 5,000 agütsütsü, anganwadi workers, ASHA workers aser para-teachers nem ita shia sen 5,000 agütsütsü aser mid-day meal sorochokertem nem ita shia sen tali meyrjang kaka agütsütsü.

August ita nungi tenzuka Civic volunteers, Green Police personnel, NVF workers, Prani Bandhu aser Prani Mitra workers nem ita shia sen tali 2,000 agütsütsü.



TIR YIMYIM YIMOBILEM (EDITRIAL)

DIMAPUR TUESDAY, JUNE (AAMI) 23, 2026

Arem shia arur

Asenok yimkongi tekong lu ayimba mapangbo arem mali kuma ooya liasü aser arem malinungji arem shirurua parnoksa mali aküm, kechiyong arem ya meimchirtem asoshi dang masü saka arem shirurutem asoshi chiyongtsü angudak aser parnok jenokdak ki lir. Atangji, asen lima nung mapang ka arem samaa aobaji tekong lu ayimba kisung agi masü saka, talisa, log atsungba agi arem min agi moapu kuma sama. Item ajakji asenoki tarutsü indang mebilemdangi inyakba ajanga takoksa angubatem lir. Ashi, tekong lu ayimyonga asenoki item lutem nungji yakta-yakta meia süngdong tulu akümba süngdonglidong atem asübo arem agi manungla aser lok atsüngertemia lok atsungba melenji yakta süngdong tulu kuma aienba süngdongtem temelen tema yutsü asübo jungla. Ajisüaka, asenoki aiben tanü nungdak perira asung anogobo marutsü amai bilemer, iba jagi asenoki agiba aser achiba melena temelen kecha inyaka metoktsür. Ashi, tanü asenoki süngdong ka lensüka agibaji oboula aser obala nungertemi wazüka yutsüba süngdongtem lir, anungji asenokia asen chir aser semchirseemnurtem asoshi bilema teti arem melena arem aser tzü melena tzü aser mopong tajung melena ano mopong tajung wazüka yutsütsüba asen tsüa akaba küptoker ama inyaka yutsütsüba mapa ka lir ta angateta inyaktsüla. Atangji, asen lima tesem aika nung asenoki arem mapayu aser tarutsü atema mebilemdangi inyakaka, ano yimtak yimtsüngtem aika nung arema wazüka ayuba agi arem shia aruba asenoki angur. Item aremtemji angu dang aser ajanga süidang ozü sangnu ola angashir aser arem shirurutem senzüba angur. Ibaji asen lima moamejitsü tenzükba tamaittsü ka asütsü. Atangji, asenok ya shi achiba kin asünungji, asenok aikati arem nung ozüsangnu aser arem shirurutem mapayui khaseta achir, ibayongji asen lima nung waroa mali samaba tanü tashi meyipa marur. Ibaji asenoki mangateti inyakba mapa ka asütsü. Atangji, arem nung ozüsangnu aser arem shirurutemji asenok achitsü atema Tsüngremi yanglutsübatem lir, ajisüaka asenoki tapayu mali ozüsangnu aser shirurutemji soyapokya aotsüsa mapang magütsüra aser tanguba temang samatsüra, asen lima nung arem aliyonga ozüsangnu aser shiruru mali azüngazünger asütsü. Ibaji dang masü saka ozüsangnu aser arem shiruru maliba arem nungji nisung atema lendong aketba shiruru per aser merila nungertem dang talubosa apoktsü. Item ajakji bilemdanga, tanübo tangatetba putu asünungji, süngdong ka lensük shia süngdong ana temoka yutsütsü aser arem shiruru tsüngkümtepa mapang meinpronga masütsü aser techanu abenba, antsü amokba aser techanu tila bentsüba mapang ozüsangnu aser arem shiruru kata mesamatsüi kümzüka yutsütsüba aser shia teinyaktsü mapa asütsü. Atangji, süngdonglidong aser shirurutem ajungaji nisung asoshi lir, anungji süngdong tulu kümer lensüka agiba nungji kecha tai mali. Kasaji, ozü sangnu aser arem shiruru tain kümer atsü apong aser tulu tila meteta khaseta aser pua achiba nungji tai mali, saka asenok tanü agir asung asen chirnur aser semchirseemnurtemibo ozü olaa mangashitsüsa arem aser yangji aliba taküm shirurutemji samatsüra, ajibo asenoki mebilemdangi inyakba tamashi mapa tuluka asütsü. Atangji, arem aser yangji aliba taküm shirurutem kümzüka ayutsü nungdakba ya tanü lanurtemibo angateta lir, saka, taaktsüka, asenok taintemiang mangatet. Aji oda, tanü lanurtem aikati arem shi sapua machir saka taintem asoshi shi rongnung arem shisa tajungba, anungji arem shi atemabo arem nung amuia mao aonung piyong timtem arema arem shiruru mita jajar. Joko, putua melener asünungji, tanübo tain sülen lanurtem anidakdaksüba putu masü saka lanurtem sülenang taintem anidakdaksüba putu lir. Aji oda, arem ali nung dang alima nung tzü tajemtsü tajung peria angutsü, moponga tajung angutsü aser arem nung arem shirurutem tapu ajak ali nung dang kati ka nungdak atalokdakja Tsüngremi yangluba libajen meraksadaksüi asenok nisungtema meshirangi anemtepa alitsü. Atangji, ibai alima tasen kümshia yangluba mapang ka lir, yangji asenok ajaki arem aser yangji aliba taküm shirurutem ajakji asen kija meyong masü saka asen chirnur aser semchirseemnurtem meyong shilemang tuluba lir ta tangatetba nung shilem tajung agitsü kanga nungdaker.

OLEMSABANG

SAMANIR KIN ASEN-I SAYUTETBA KIN NEM WANGSHIDAKTSÜR.

Aor-i mapa tajung inyaktetba ajak Ngalu chirepdaki.

-K. Lima Longkumer.

Alima telunglung ya kün lungtemdang küm ka akir. Küm ka nung anügo 365 jaja aodang Mungbu (season) pezü melentepper aser ano shilur. Yamaji ayongtem karbo tesem kar nungbo melenshia ayimmer aser ano mapang kar nungbo tejenba lenmang du bushia ayimmer ta asen tsürapor-i jemphia aruba asenoki metetta lir.

Yamaji Israel nunger dang meimba ama asen kin danga Tsüngrem-i kanga saklokka meima aru. Metsütsei-i Tsüngrem Amsüh walok-tsübaji 1872 22 December anügo Mulongkimung nungeri akizük, aji macüdang tsürapor Süpongmeren tama aser ano pa sülen par yimmersa nisung terpungu-i Khrista akizükka Sibsagar Assam nung Bapti, aji tetenzüker cür jogo Aor yim ajak nung Khrista osangtajung akizüka tanem tanem-i Aor yim ajaki amangsep aser jogo tazünger aeka adok aser ano Bible aser Theology azünger tajung aeka adok, item tsürapor ajakji Naga lima nung tamapur aküm Education ajanga tulus aküm, ano Bible/Theology azünger aser teacher ajunga amai ENPO-len sünga prokshia osangtajungji merokmi ama ayimsünga prokshi. Lia arudang jogo Naga nunger-i Aor dang SAMANIR ta nungja jaloktsü. Tanübo Aor 21st Century nung alirtemi tsüraportemi mesoa yutsüba konang ajak laodaktsüdaki, itemji Church leader's yimden nung lennirtemi anir nütsüng nüpur-a nüchi macü yiar-a mesük Azü-a mesük aser politics nung jangrar jana ama adokker Aor rongnung zünger mezüngma lir. Tsüngrem külemi maor aeka lir, Yi achemer aeka lir, mozular aeka lir, kinungtsür-i kinungpo aser chirnur soa yutsür tepor tasen den nemzüba aeka lir, kinungpor-i bi kinungtsür yutsür tetsür pa nem magutsüba tetsür den nükyimpangyima senzür aeka lir tepor dang macü tetsür denna yi chemma nemzünembunger Ao tsür aeka lir, tetsür kati tepor ana asemden lia senzür.

Nisung aeka tema nungba san chanu amai sherongi gadu küp meyiba ama aeka lir. Item jagi yimden nung kanga jangrar aser itemji politics nunga kanga mayang cüa jajar, Arogo-i itemji kechisarina nung amshir, Arogo important post (Toklang) tenzükker aser Deacontem shimtsü nungloktsür tanü Arogo nung pesaprongba ya item nisungtem mapa ajanga temenen tah angur anungji rongronger.

1. Temeshi Laishiba nung yamai ashir kinungpor-i bi kinungtsü dang bi ama meimang. Bi kinungtsü dang dang meimtsüba ashirba macü aji saka tetsür ajak dang kasa meimtsü ozüng amai agüja lir. Temeim penshitsüba nungji ambangyim, mezüngmeshi amokmeren aser züngtokba künyongi mamunger, ibai mi aser tzü ami, künyongi palala. Tejen putu nungi tepor-i tetsür-ji kecha nunga mezüngkok kinük nisung kümdaktsü, aji saka parnokia she azü abung nungbo hatir tajung amai larnok amshir.

2. Bi kinungtsü yur thangar tetsür den japu jaritepper. Tepor kanem tetsür ka dang moatsü. Tasüba dak alakka. Tetsür nem tepor aküm kütta reprangdaksütsüla. Tetsür kati yamai ashiba bilemtetter. "Tepor yabo kanga sempara" kodaser tetsür-i tepor sempara ta shitettsüba aji miyimlaba ou. Shiruru mesükba tazü nisungi alima menentsüba ajanga. Mejempinüa jempir. Tanü tepo asem-i küm 14 tain tetsür tanur ka dak ambangyima shenung medembayong hapta anashi Dimapur anakshia ola adokba asenoki metetta lir, ya air chanulai melunga inyakba amabo mangashir, angashiba agi mapang mapang nung benshiba aser amokmeren mapa lir ta jemphia angashir, takoksa ajurulai la aliba kiburia ta ashir, saka kechiba Police nem podaktsü? Police nem podaktsü nungji küm aeka akia jemphia aotsü, yangji State Govt. Expenditure den nübu aser mapang kanga lalutsü. Dimapur nung Aor telok tentet paika yur Aor salang nung jaokka jempitsü melen aser aibelener dak alang senchimechi akir khün ou-ji yakta süsümedema tembangtsü melen tamajungba aser tuluba jangrua aotsü. Tanü Ao/Naga salang tashimait kümugo. Ao senden aser Ao watsü-ibo aibelener tem aitsügo, Dimapur nung alir-ibo khün ou koma tembangtsü, shirnok medentsü memetet ta jempir, Dimapur nung alir ola makabaji aji acütsüa akok, anungji asenok tang tangbo shisabulua melili ta jempir. Aji saka air chanulabo tepor tain asem-i rape acüa ta kuli agütsü aser labo iba Rape case ajanga Hospital nung mungdar ta angashir. Dimapur nung CSO's-i akangba nungbo yamai shia angur. "STAND WITH HER". Naga nungerbo asenok denbo denna malitsü südi. Ber agi sheti kolak menembangtet ta ashiba ama asen kin-i aibelenba kecha akia menembangtetsü.

Kechisa atalokogo asen kin yagi tansü kar jogo kümdanga alitsü merangdi. Küm isheka süia ogo, asen adianu kar-i asen kin-tsür Rape-ser tepsetba tua mamae lir, asenok sasa asenok mashiokdaksüdi, jogo shiruru shisatsü nungi piladi.

Asen jala, asen semchir dak asen-i temeim mesayutet nung tanü la tiamakala jenjang nung lir. Asen kidanger den asen antsüteppa malitsü, titi meimteppa alitsüba merangdi.

Asen Aor-a nüchi nisung lir ta imli sayua aser parnok mulungjang nung jempidakja taküm 2026 küm 21st June anügo ji FATHER'S DAY tenjir anungji takümbo iba anügoji AZÜNG LAA (Aor kija) yutsüdi, memungli, kechiyong Aor tepo ajak dak Amok tugo. Thangar temulung Korema alidang asenok HAPPY FATHER'S DAY ta mejempili. Chirnur-i chiyongtsü aser suoshi onok nem alia sempettsüba taküm atemabo mapüp aser manang acütsü.

Adangji Aor dak tajung aliba ajak samaa odaki, tanübo Aor NGALU chirepdake. Mapa tamajung inyakbayong mit adokker, asenokbo kecha macü ama lemsüng-lemzünga lira asenok dak thangari kechasüdanga temelongtokka malitsü, aser tajung meyimlatsü.

Tsüngrem dak amangpetbayong maksüang ajanzüker. Aortem asenok tang nungibo Tsüngrem dak chichia kangokka amangdi.

Iba shity züluba ajanga shinga temulong teyiru, saka shisadanga lidi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Gaza nung Khristantem mesendoktsü: Jerusalem Latin Patriarch



Jerusalem nung Latin Patriarch Cardinal Pierbattista Pizzaballa aser Patriarch Theophilos III na Gaza tonga aruba sülen tangokba noksa nung angur.

June 22, 2026: Hombarnü Jerusalem Latin Patriarch Cardinal Pierbattista Pizzaballa-i Gaza nung Palestine nunger Khristantem mesendoktsü, ta metetdaksü.

Hombarnü Pizzaballa aser Greek Orthodox Patriarch Theophilos III nati Gaza semdang. Tesüiba küm aika tsüngda Israel-i Gaza nung Palestine nunger jenti tepsetba sülen tang Gaza nung Khristan nüt süng ishika dang anünga lir.

Gaza City nung aliba Holy Family Church nung tekülem sentong nung jembidang Pizzaballa-i, "Yirusalem nung aliba Arogotem ajaki nenok den salem osang lemsateper, iba denji külemi nenok atema sarasademtsür aser nenok nungiter," ta metetdaksü.

Paisa, "Onoki nenok kodanga mesendok aser kodanga mesendoktsü," ta ashi.

Tang Gaza nung Palestine nunger Khristan 1,000 shi dang lir. Rara ajanga Khristantem aika jenshiogo aser tang ishika anünga aliba Khristantemjia chiyungtsü agi kanga anünga timtema lidar.

Latin Patriarchate of Jerusalem-i sangdong ka ajanga, "Arogo nung lenirtemi Gaza semdangba ya Jerusalem nung aliba Arogotemi Gaza nung local Arogotem aser nüt süng ajak atema bilemstüba temaitsü lir, kong kibongtem aika timtem, tetsübu, takoksa aser mejangjaba tia nung lidar," ta metetdaksü.

Gaza semdangba mapang nung Pizzaballa aser Theophilos

III nati Arogo nung lenirtem aser tang rara agi kongshiba kibongtem ajurutsü.

Hombarnü Pizzaballa-i Gaza nung aliba Al-Azhar University nung yimsü balala nungi lenirtem shisa lemsatepba sentong ka nung shilem agiogo.

Pizzaballa aser Theophilos III na den relief organisation Malteser International nungi züngsem aikati Gaza semdang.

Yaküm-a Khristmas atongtsü anogo ishika jelia Pizzaballa-i Gaza semdanga Holy Family Church nung tekülem sentong agia liasü.

Yaküm July ita nunga Israel-i amakdang Tenla kidang nisung asem asüba sülen Pizzaballa aser Theophilos III nati Gaza semdanga liasü.

Court-i Missionaries of Charity nungi nun ka maitsüi chiokogo



2018 küm July ita nung tanur shibelenba ken o ka bushisüngdangba mapang Ranchi nung Missionaries of Charity nungi nun kati National Commission for Protection of Child Rights nungi team ka agizükdang tangokba noksa nung angur.

June 22, 2026: Jharkhand state nung Missionaries of Charity nungi nun kati ozüng alema tanur shibelen, ta tai tonglokja la anema ken o benoka liasü, ajisiüaka küm 8 lir sülen iba ken o nung lai maitsüi obendang agütsüogo.

June 18, 2026 nü Jharkhand yimtiba, Ranchi nung Court of Additional Judicial Commissioner Shailendra Kumar-i, Sister Concelia Baxla aser Anima Inderwar na anema kuli peria mali ta shia iba ken o nung tena maitsüi chiokogo.

Nun Concelia Baxla, Ranchi nung aliba Nirmal Hriday home-i oa aliba mapang nung 2018 küm July ita nung la pua liasü.

Tanur maliba apuani kati, Nirmal Hriday home nung staff Inderwar-i tena nem kinü tanur ka agütsütsü ta nangzüka sen meshi, ajisiüaka tena nem tanur magütsü, ta ashiba nung ajemdaker Baxla pua liasü.

June 18, 2026 nü court-i, "Ken o benokertemi parnok nem tai tonglokja aliba atema kuli magütsütet," ta oshidang agütsü.

June 21 nü osangbenertem den jembidang Jharkhand nung Daltonganj diocese nungi Bishop Theodore Mascarenhas-i, "Missionaries of Charity nungi nun tem anema tiyazü aika jembiaka ochi jungkai adokogo. Nun temi

parnok taküm bendanga agüja tangari sendokbapurtem anepalua arur," ta metetdaksü.

Mascarenhas-isa, nun Baxla apuba mapang nung la arrshi küm 61 liasü aser diabetic liasü; la ita 14 jail nung amongtsüsa aküm, ta metetdaksü.

Arogo nung lenir kati, court obendang ya ajanga iba ya nun anema inyaksü aser Missionaries of Charity tenüng menüksütsü atema inyakba liasü ta kuli sayur, ta metetdaksü.

Mother Teresa-i 1950 küm Missionaries of Charity ya tenzüka liasü aser tanübo alima tesem balala nung Missionaries of Charity indang house 770 nung nun 5,000 shi lir.

ANOGO ABEN TSÜNGREM DEN

Osangtajungi kechi inyaker

"Kechiba nenoki kü dang, Kibuba, Kibuba, ta ajar, aser Ni ashibatem mebenshir" (Lk. 6:46)

Ken kenbo osangtajung dak tashi yasa ania adoker asü taa bilemer, kechiaser aikati Khrista agizükaka kecha tajungbaleni maor. Saka ya Osangtajung tai masü. Osangtajungji angashir Kibuba, Kibuba ta dang ayimtena alibaji teperi masü, Osangtajung jagi asen taküm melenshidaktsütsüla.

Kenü sayutsünger ka lenmang nung jajaa alidang sapon (soap) yangluba company kibur ka ajuru. Tenaji otsü alongtsü tenzük. Sapon yanglusang jagi ashi, "Nai sayuba Osangtajung ya jungrabo masü alitsü kechiaser ano nisung tamajung aika dang lir. Tena anasaji tanur ka lishi agi mezüpanger tenapronglai angu. Idangji sayutsünger jagi langzüa ashi, "Nai yangluba sapon ya jungrabo masü alitsü, kechiaser aika ano memerüki lir". Kanga dang kara sapon yanglur jagi ashi, "Sapon amshi nung dang temangji merüktsü". Osangtajungjia yamaji dang" ta sayutsünger jagi langzü.

Osangtajungji aseni mebenshira memerüki dang alitsü. Khristan yimsu jagi asen taküm yimya libaliro melenshidaktsütsüla, yamaji asünung dang tajanzük alitsü.

FIFA World Cup mapang nung Bible societies-i Laishiba lemtsür

June 22, 2026: 2026 FIFA World Cup mapang nung Bible societies aser Khristan ministries aikati iba asaya reprangertem nem Laishiba aser Khristan kakettem lema agütsüba den külemi sarasadem sentong ayongzüka agir aser Khrista osangtajung lemsateper.

Taküm FIFA World Cup ya linük asem- United States, Mexico aser Canada linüktem nung ayongzüka asayar.

US nung American Bible Society-i Youth Sports New Testament lema agütsür. Iba Tasen Lai ya lanur saisapongertem, coach tem, tsüraburtem aser team lenirtem atema adokba lir.

Khristan kakettem nungji Lai tekongtem aser taküm kulitem densema lir.

Mexico nunga Mexican Bible Society-i World Cup outreach nung shilem agia iba asaya reprangertem nem Khristan kakettem lema agütsür.

Mexico nung Christian Daily International indang Spanish edition Diario Cristiano organization-i 'Determined to Do What Is Right' ta ser evangelistic kaket nung. Iba kaket nung tournament dak sendakba ockettem, Khristan osang aser tekümtet indang lir.

Iba kaket ya Mexico nung aliba evangelical Arogotem

aser ministries-i yaritepa adok. Sentong ayongzükertemi FIFA World Cup asayaba yimitem nung evangelistic kakettem aika lemtsütsü aser Khrista osangtajung lemsateptsü.

Canada nunga Canadian Bible Society-i My Bible Platform ajanga 'FIFA World Cup 30-Day Devotionals' ta ser devotional series ka lemsatepogo. Iba online resource nung anogo 30 nü Lai azüngtsü aser tamang jenjang asadangtsü ockettem lir.

Anogo shia atema Lai tekongtem, tasüngdangba balala aser sarasadem onüktem lir.

Ano külen Bible World Cup Journey-ia iba asayamong piyong anogo shia Lai azüngtsü aser shilem agiba teams atema sarasademtsütsü ayongzüker.

Sentong ayongzükertemi ashiba agi, World Cup asayamong ya Laishiba azüngtsü atema ajungshitsü asoshi maongka tajung. Iba project kübok Arogotem, kibongtem, lanur teloktem aser asaya reprangertem atema resources lemsatepa lir.

United States, Canada aser Mexico nung ayongzüka World Cup nung linük 48-i shilem agidar, aser iba maongka agia Bible societies aser Khristan ministry balalai Khrista osangtajung lemsateptsü atema asalentong balala apiteta inyakdar.

AO OSHI ANGAZÜKDAK:

TANÜ ANGAZÜKTSÜBA OJANG



Yimsüsür

(n) yimten lenir, ozüing yanglurtem (ruler, administrator)

* Asen lima nung ochishir yimsüsür nüngdaker.

Yimsüwar

(n) yimtak tainer, yimsüsür tajung (popular and distinguished ruler)

* Yimsüsürtem rongnung yimsüwar aliba agi yimten akhüm aketer.

OLONG PAITEP # 7543

Grid for Olong Paitep # 7543 with numbers 1-16 in various cells.

TIPIEN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüingsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüing tajemetdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7542 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Süjak, 10. Aonung, 11. Dokan, 13. Tinu.



ASENOKBO ASEN SASADANG YANGLUR ASER AZÜOKER :

Jabaso: Oba, ni yasüing pongmang nungji lenmang kati aodang lemjem ka nungji veterinary dept, pur aruata süng agi yangluba frem nungji Nashi pongchi ishika nokdaker alena lir, aser aji joko kashi asütsü yangluatoktsüba ta nguogo, ano tatsüka odang nung tesem ka nungji küsaji Ak tetsü tepong aika alener Ali nungji kashi asütsüa ta ondaker nguogo, Süra Oba, asenok meimchira shirnoki yanglutsü, aser shibasa kashi asütsütsüla?

Alokba: O tebusang, asenokbo shingaiia kashia masütsü teyanglua meyanglutsü, saka asen sasa agi dang kashi asütsü aser yanglua azüoktsüla, anungji !!

Jabaso: O Oba Alokba !!

Lilir - I. Kilang Ajem, Indisen, Dimapur.

Taoba Manipur Police officer Brinda-i election nung tokteptsü



Imphal, June 22, 2026

(Agencies): Taoba Manipur Police officer Thounaojam Brinda-i Deobarnü taruba Assembly elections nung la tokteptsü osang metetdaksüogo.

Manipur nung 2027 nung Assembly elections agitsü lir aser idangji Brinda-i Yaikul Assembly constituency nung tokteptsü ta ashi.

Deobarnü Brinda-i lar kidang la pusemertem aser temeket nung alirtem lia iba osang

metetdaksü. Ajisüaka lai koba political party nungi tokteptsü memetetdaksü lir.

Brinda-i election nung public teyari meshi aser constituency dak sendakba tebilemstütem asoshi inyaksü ta ashi.

Brinda-i 2022 Assembly elections nunga Yaikul nungi toktep saka Thokchom Satyabrata tsüingdang tamakok angu. Satyabrata ya tang Manipur Legislative Assembly nung Speaker lir.

Brinda ya taoba mapang

Manipur Police ketdangsür ka liasü aser lai anti-drug operations inyakba atema nisungtemi meteta aküm.

2018 nung taoba Chief Minister N. Biren Singh-i la nem Police Medal for Gallantry agüja liasü. Brinda-i drug network tulu ka maddokba aser tongtipang nisung aika apuba atema iba sempet agütsü ajisüaka iba ken o nung tongti süa tai tongloksüsang metentsüba sülen lai Police Medal ji meyipa agütsü.

Arunachal nung NSCN-K (AngMai) züingsem ka apu

Dibrugarh, June 22, 2026

(Agencies): Arunachal Pradesh kübok Tirap district nung Assam Rifles aser Arunachal Pradesh Police yaritepa NSCN-K (AngMai) züingsem ka puogo.

Iba nisung ya Longsom Losu (Gangsa) ta jangjaogo aser pa ya Tirap district nungi lir.

Iba tesem nung telungpur ka

senzüsenbongba indang osang tejangja ka angazükba sülen joint operation ka agidang telungpur apu.

Iba mapang pa ket nungi 7.65 mm pistol ka, magazine ka aser 7.65 mm injangtem bena aliba ngutetogo.

Assam Rifles aser district police külemi yaritepa telungpur maparen anema inyaka aruba

nung iba ya inyaktetogo ta ketdangsürtemi ashi.

Tawa-tanü security forces-i telungpur telok balala nungi züingsemtem puogo.

"Onoki counter-insurgency operations inyaka arur. Iba tesem nung telungpur maparen azüoktsü atema onoki akokba tashi mapa meranga inyaker" ta ketdangsür kati ashi.

Assam Rifles & DRI-i Rs 1.31 crore alang poppy seeds apu

Guwahati, June 22, 2026

(Agencies): Assam Rifles-i Directorate of Revenue Intelligence (DRI) den külemi mita aodang Deobarnü Rs 1.31 crore alang poppy seeds puogo.

Iba ya Assam kübok Cachar district nung lir aser osang tejangja ka angazükba sülen

mita aodang apu.

Assam Rifles aser DRI ketdangsürtemi Silchar Bypass Road nung gari ka soter mita reprangdang poppy seeds bena aliba angu. Iba gari nung Rs 1.31 crore shi alang poppy seeds seret 8,764 bena liasü.

Iba dak sendakba nung


Silchar nung alir nisung ana puu lir. Ketdangsürtemisa Tata truck gari ka aser mobile handset ana puu lir.

Assam Rifles aser DRI ajanga anti-contraband operations inyaka arur aser iba ya drug trafficking networks samatsütsü nükjidong nung lir.



June 21, 2026 nü Defence Minister Rajnath Singh-i Eastern Air Command headquarters, Shillong nung Indian Air Force aser Army personnel 1,000 shi ka den International Day of Yoga amungba angur. Indian armed forces-i Deobarnü linük tesem balala nung Yoga Day sentong balala ayonga agi aser Shillong nung amungba sentong nung Meghalaya Chief Minister Conrad K Sangma, Chief of the Air Staff Air Chief Marshal A P Singh, Air Officer Commanding-in-Chief of Eastern Air Command Air Marshal Inderpal Singh Walia, aser General Officer Commanding Headquarters 101 Area Lieutenant General Mohit Wadhwa nungeria shilem agia liasü.

De La Espriella-i Colombia tir election kokogo



Bogotá, Aami/June 22 (Agencies): Far-right lawyer Abelardo De La Espriella-i Colombia tir election kokogo. Abelardo de la Espriella-i vote shilem 49.7 angu aser left-wing Senator Ivan Cepeda-i vote shilem 48.70 nguogo. Election achaayangba ketdangsürtemi result shilem 99.9 bo Hombarnü sangdongogo.

Arishi kum 63 tain Cepeda-i, tir Gustavo Petro indang policy tem maneni benoka inyaksü tenangzükba agütsüer liasü, kong lokti libaren atema nungtugu inyakyimtem aser telungpurtem den maneni sensak asemtsüba densema lir.

Petro ya taoba mapang sorkar anemer ka aser linük nung mezüngbuba leftist tir liasü.

Kasa mapang nung De La Espriella-i, linük rongsenketzüng aser security jenjang mejungi akumba ya Petro dak tai tongloktsüogo, aser telungpurtem den sensaksem anentsü aser totzü aser gas sector ajungketba den saru tajemba kumdaktsütsü nangzuka liasü.

"Ni Colombia nunger ajak atema yimsü asütsü," ta De La Espriella-i Barranquilla yimti nung pa pusemertem dang ashi.

Taoba mapang US tir Donald Trump-i pa nem tenüngsang agütsüba pai

pelashishia agizüka liasü. De La Espriella ya US aser Italy senso lir aser linük aika nung par ki lir.

"Iba takok ya Colombia atema lir. Nükjidong tejanga ka makai kum pezü tashi laluba sülen temelensi ka aruogo," ta mechanical engineer Viviana Olivos-i Reuters news agency dang ashi.

De la Espriella-i election akokba tetezü Colombia nung right wing tashi dangi aruogo, shirnoki taoba kum 200 tsünga kum pezü dang yimsüsa liasü.

Ajisüaka election tera agi dang akok asünung De La Espriella-i pai benokba onük karbok agintsü akok, ajita asünung dang lemdanger aliba Congress nungi teyari angutsü.

Tongtibang business guilds temi De La Espriella nem pa takok asoshi tenüngsang agütsüogo aser Bogota aser Medellin nung upper- aser middle-class kiyongtem nung pa takok asoshi benjungtepa liasü. Colombia nung vote agütsütsü temsüa alir million 41.4 nungi million 26.3-i vote agütsü.

Keir Starmer-i UK ato kilonser menden yutsür

London, Aami/June 22 (Agencies): British Ato Kilonser Keir Starmer-i mapa nungi yutsüba Hombarnü sangdongogo, koba Labour Party nung popularity ajema kuma lenir melenstü ita ishika jembia aruba sülen ataloker.

Pai iba menden yutsüba ajanga tesüiba kum 10 tsünga kümsük tembanga meinyaki mapa yutsüba British ato kilonser rongnung Starmer ya trok buba alitsü.

10 Downing Street kima nungi sangdong ka agütsüba nung, party sasep nung tebilemstü lemsatepba angadongogo aser menden aitsütsü telemtetba agi, ta Starmer-i ashi aser pa melener ka meshim tashi inyaka alitsü ta metetdaksü.

Labour lenir aser ato kilonser ama inyaka aruba bilemteta jembidang Starmer-i sorkar inyakyim balala bhukuma jembi aser rongsenketzüng, mapa inyaker temeden aser makamait ajemba nung takok tulu nguogo ta shia liasü.

July 2024 general elections nung pai anir Labour ajanga takok tulu ngur kum ana majungdang pai menden yutsür alitsü. Pai linük den jembidang Labour Party lenir akumba mapang timtem balala ajuruba indang bilemteta ashi.

"Kum trok tejakdang ni Labour Party senmang amang. Kü dang aiben kü party tembangogo ta ashi. Saka asenoki nüburttem tai ta kuli agütsütet. Asenoki asen party melentsüogo," ta pai ashi.

Meranga inyakba ajanga party melenshiogo aser Britain asoshi mangdang bushiba nung yariogo, ta Starmer-i ashi.

Ato kilonser menden yutsüsangi par sorkar indang rongsenketzüng otsüa tuteta ashi.

"Asenoki tashi taitba rongsenketzüng takok ngutet, taa tekeraba nung ainer, investment wazüka yuogo, timtema aliba tembangtsüogo, mapa inyaker temeden tajungtiba kumtsüogo," ta Starmer-i ashi.

Par administration-i makamait nungi nisung million tesadang ka ajungketogo aser Britain maneni mera keta nokdaksüsa yutsüogo, ta pai ashi.

Starmer ato kilonser menden nungi anentsü asoshi ita aika nungshia aru, saka Greater Manchester indang taoba mayor Andy Burnham-i parliamentary election ka nung takok ngua Westminster-i meyipa shilangba sülen tali nungshia liasü.

Burnham yagi Labour lenir asoshoi Starmer den tokteptsü nükjidong nung nübuyima liasü.

Pai Nigel Farage'er Reform UK nungi candidate ka madak takok anguba ya party tia melenshitetsü ama Labour nung ozüing yanglur aikati pa dak ajitet.

Starmer-i party lenir asoshi tokteptsü asü yutsütsü ta asadanga hopta tembangdaksü. Pai Hukulbarnü ang tokteptsü ta shia liasü, saka hopta tatemlen jembishinüba ajanga temulung melenshitsüsa akum.

US-Iran jembishinü terenlok nung tembangogo

Bürgenstock, Aami/June 22 (Agencies): Rara tatem kati arutsü asoshi tatembang tezüngzüktep yanglutsü atema US aser Iran tsünga mezüng jembishinü terenlok nung tembangogo, ta odongtar Qatar aser Pakistan nati ashir.

Hombarnep linük ana yagi sangding ka külemi agütsüba nung, anogo 60 tsünga tatembang tezüngzüktep yanglutsü atema 'roadmap' ka mulungtepogo, ta ashi.

Lebanon nung rara tembangtsü asoshi terenlok tulu liasü, ta Iran foreign minister Sayed Abbas Araghchi-i ashi.

Taoba hopta zülutepba memorandum of understanding (MoU) nungya Lebanon densema tesem ajungalen rara tembangtsü aser Strait of Hormuz tanaben lapoktsü dena lir.

"Pakistan aser Qatar tetsüngtai aiba ajanga Lebanon rara tembangtsü asoshi terenlok tulu agütsüogo," ta Araghchi-i social media nung ashi.

"Totzü aser petrochem exports yutsüogo, nokdanga aliba agienogo, soita aliba rongsen kar salaogo, aser Iran asoshi tongtipang reconstruction aser development plan tenzükogo."

Iran tsütsü nungi iba ken o jembirtem Hombarnü Switzerland nungi ainshioogo aser technical tsütsü jembishinü maneni alitsü, ta Iranian state media ajanga ashi.

Strait of Hormuz ajanga commercial rong tem timtem majurui ajanga aotsü nükjidong nung timtem mataloktsü aser osangtsüsang abenba nung metokmeperi majurutsü mechi communication line ka

tentetogo, ta Pakistan aser Qatar nati ashi.

Lebanon nung military operations tembangtsü atema odongtar linüktem teyari nung US, Iran aser Lebanon tsünga "de-confliction cell" amenoktsü ajaki mulungtepa agizükogo, ta ashi.

Chichiba tetendangba mezüngbubaji Lebanon de-confliction cell ya alitsü, ta Araghchi-i ashi.

Lebanon Tir Joseph Aoun-i Hombarnü US aser Qatar ketdangsürtem den jembioogo ta pa indang office ajanga ashi.

MoU ya zülutepba sülen southern Lebanon nung Hezbollah telungpur aser Israel sepatem tsünga rara tesashiba akum aser Israel nungeri tayimtsü amshia amakba mapang tetsür aser tanurtem densema Lebanon nunger aika tepsetogo, ta health ministry ajanga ashir.

Israel aser Hezbollah tsünga ceasefire tasen ka Hukulbarnü sangdong. Tanen makai raraba aser tayimtsü amshia amakba ajanga Iran-i Honibarnü Strait of Hormuz shibangogo ta sangdonga liasü.

Hezbollah-ia ceasefire mulunga lir ta ashi saka Israel-i par litsü rakzüktsü merangba mesüra occupation ulushitsü merangba anema nokdaksü ta ashi.

Rara tang tajemba lir, saka Israel Ato Kilonser Benjamin Netanyahu-i northern Israel kumzuka ayutsü asoshi nungdakba mapang tashi southern Lebanon nung Israel mitkartem alitsü ta ashir.

Taoba hopta züngzüktepba kübok Iran yagi Strait of Hormuz tanaben lapoktsü shia

liasü, koba ajanga alima nung totzü aser natural gas shilem 20 shi abener.

US-ia Iran nunger rongnendak nungi arur aser aoba rong tem nokdanga aliba agientsü mulung.

Iba tezüngzüktep nung Iran yanglushitsü atema sen \$300bn agütsütsü aser US-i par nem sanction agüja aliba agientsü dena lir.

Ajisüaka Iran indang nuclear programme onük ano mejembi lir.

Philippines nung school ka nung kaketshir asem khaset

Manila, Aami/June 22 (Agencies): Manila southeast len Tacloban yimti nung school ka nung arishi kum 15 aser 14 tain kaketshir anati school-i prangbong bener arua khaloktsüba sülen kaketshir asem tepset aser tenet yirutsüogo, ta police-i ashi.

Iba lendong atalokli temulung meleme bilemer ana rongnung ka apu aser tanga ka yagi pasasa ketdangsürtem nem bendanga agütsü.

Police-i ashiba agi, tena yagi 9 mm Glock pistol ka aser .38-caliber revolver ka amshi, saka tenati prangbong ya kolen nungi bener aru aji tang tashi mejangjai lir. Police-isa, lendong atalokba tesem nung injang tazüng 40 ngutetogo, ta shisem.

Philippine National Police otongdar Allen Rae Co-i ashiba agi, pistol ya tang bushisüngdanga aliba police officer ka nem agütsüba lir aser tang regional police ket nung yua lir, aser revolver ya central Philippines kübok Cebu yimti

nung security agency ka tenüng nung züngoksema lir.

Philippines kübok school nung iba amala lendong ya aibenbo mataloker. Linük nung prangbong alizüktsüba dak sendakba nung temzüng ozüing tesashi benoka lir, kong prangbong alinertem takum jenjang aser tekolok shita ali mali kanga junga jangjarang prangbong ayoker. Ajisüaka ozüing alema prangbong balala maneni belenshia arudar.

Philippines nung ita ka tepeyong school tem shibanger aliba lapokshiba sülen hopta ka dang lir iba lendong ataloka liasü.

Temulung meleme bilemer anaprongla ya social welfare ketdangsürtem nem bendanga agütsüogo. Ken o ashishiba sülen kaketshir anaprongla ya grade tenet asüba mapang nungi tangari mezüngmeshiba jangja akum.

"School nung tangari mezüng meshia amshiba mang ayangtsü asoshi iba jenjang agi

ta ngutetogo," ta Co-i osangbenertem dang ashi.

Tir Ferdinand Marcos Jr-i iba lendong atalokba osang angashia kanga temulung koremba lemsatepogo, aser ken o kanga junga bushisüngdang tetuyuba agütsüba den nüburttem adenshiba tesem aser talisa school nung nüburttem kumzuka toktsütsü atema jenjang tapet agitsü ketdangsürtem nem tetuyuba agütsüogo.

Police-i ashiba agi, lendong nung yirurtem temang anepalutsü atema school anasa aliba mozükitemi anirogo aser kaketshirtem, staff, tsürapurtem aser temeket nung aliba lokti kumzuka toktsütsü atema police talila yokogo.

2022 kum July ita nisung kati Quezon yimti nung Ateneo de Manila University law school graduation sentong nung injang khaloktsüba sülen nisung asem tepset, kong taoba Lamitan yimti mayor Rose Furigay densema liasü.

Mokokchung nung High School & Higher Secondary School Basketball Tournament akatsü



BAMD pur Mokokchung nung High School & Higher Secondary School Basketball Tournament akatsü asoshi June 19 anogo BAMD senden mener kelen tangokba noksa.

Mokokchung, Aami /June 22 (TYO) : Basketball Association Mokokchung District-i (BAMD) ayongzüka 2buba Inter School & Higher Secondary School Basketball Tournament 2026, August 5 nungi 7 tashi BAMD Basketball Court, Imkongmeren Sports Complex nung akatsü ta Organising Committee ajanga June 19 anogo BAMD senden nung lemtetba BAMD

sangdong ka ajanga metetdaksüogo. Iba asayamung ya "Forging Future" ta asüba omen nung ajemdaker akatsü. Iba asayamung nung ya Mokokchung district kübok aliba yimsüngtem, Town-tem aser sub-divisions-tem nungi High Schools aser Higher Secondary School-tem nungi shilem agitsü lenmang saema lapoktsür.

Maneni iba asayamung nung ano tanga district 4 nungia shilem agia asayanüba osang tejanga alinung item district-tem aser ano tanga nungia shilem aginertem nem maangka agütsüta ta kasa sangdong nungsa BAMD ajanga metetdaksüogo.

Iba tournament nung shilem aginertem item number; +91 70058 55792/ +91 84139 27804 nung tontepateptsü akok.

FIFA WC: Spain, Egypt nati takok; Cape Verde-i ano poing ka nguogo

Aami/June 22, 2026 (Agencies): Group H nung mezüngbuba asaya junga masayatetba sülen Spain-i tanabuba asaya nungbo Saudi Arabia goal 4-0 agi ayong ayonga kokogo.

Asaya tenzüker minute 10 tsünga nung Yamal-i Spain atema mezüngbuba goal idaktsü aser iba sülen Oyarzabal-i mapang tatsüka tsünga goal ana idakja asaya mezüngbuba shilem nung Spain asoshi asaya takok den kasa aküm. Cape Verde den asayaba mapang minute 30 tashi ball nung khen danga mekongshi-i asayaba sülen Oyarzabal-i iba asaya nungbo kanga junga asayaogo.

Asaya tanabuba shilem tenzüker mapang tatsüka tsünga Saudi Arabia-i own goal ka idaktsüba sülen Spain-i iba asaya goal 4-0 agi ayong ayonga kokogo.

Iba asaya akokba sülen Spain-i point pezü nguogo aser asaya ana sülen Saudi Arabia-i point ka nguoa lir.

Mezüngbuba goal idaktsüba sülen Yamal-i Messi ajateta pa ya World Cup nung goal ka idaktsüba asayar tanobusang rongnung tibuba kümoggo.

2006 küm June 16 nü Serbia and Montenegro den Argentina asayaba mapang Messi-i World Cup nung mezüngbuba goal idaktsü. Iba mapang pa arishi küm 18 ser anogo 357 liasü. Kasa mapang nung Deobarnü World Cup nung

mezüngbuba goal idaktsüba mapang Yamal ya arishi küm 18 anogo 243 liasü.

Tanga asaya ka nung Egypt-i goal 3-1 agi New Zealand akokba asaya nung Mohamed Salah (arishi küm 34) ya par linük nungi FIFA World Cup nung goal idaktsüba asayar tambusang kümoggo. Pai Magdy Abed El Ghani ajatetogo, shibai 1990 küm WC nung arishi küm 30 asüba mapang goal ka idakja liasü.

Asaya nung Egypt atema Salah, Mostafa Zico aser Trezeguet nungeri goal idakja liasü. New Zealand atema goal ka ya Finn Surman-i minute 15buba nung idaktsü.

Iba asaya akokba sülen Egypt-i point pezü nguogo aser round of 32-i aitsü atema Hokolbarnü Seattle nung Iran den asaya draw dang asütsü nungdaker.

Kasa mapang nung Cape Verde-i tamamangtsüka taküm World Cup nung mezüngbuba asayaba mapang kanga junga asaya-a tanabuba asaya nunga kanga meranga asayar Uruguay den draw süa ano point ka ngutetogo aser round of 32-i aitsü timla mesamai lir. Mezüngbuba asaya nunga parnok Spain den draw süa liasü.

World Rankings nung jenjang 63buba nung aliba Cape Verde team ya Group H nung tatembangbuba asaya Saudi Arabia den asayatsü lir aser parnoki iba asaya kokra

taruba round-i aitsü.

Asaya nung Kevin Pina-i free-kick tajung ka metsüokja Cape Verde pur tejekdang aküm, saka Araújo-i minute 44buba aser Canobbio-i minute 45+6 nung Uruguay atema goal idaktsüba sülen Verde pur tesülen aküm.

Ajisüaka asaya tanabuba shilem nung minute 61buba nung Helio Varela-i Cape Verde atema tanabuba goal idaktsüba sülen iba asaya goal kasasa nung tembang.

Serena Williams Wimbledon tetsür kija asaya asayatsü

Aami/June 22, 2026 (Agencies): Wimbledon tetsür kija asaya asayatsü asoshi Serena Williams nem wildcard ka agütsüogo aser iba ajanga la Grand Slam nung tanaben asayatsü asoshi lenmang lapoktsüogo.

All England Club-i Deobarnü sangdong ka ajanga, United States nungi nungtugu tennis asayar, shiba küm asem ser tesadang sülen taoba ita nungi asayashi tenzükoggo, la ya tetsür kija asaya atema wildcard ti agütsüba rongnung tatembangbula lir, ta ashi.

Wildcards ya asayatem rankings ajema aliba ajanga automatic entry manguba asayatem nem asayamung ayongertem agütsür, aser iba ya timba linük nungi asayatem, career nung takok tajung ngur aliba asayatem mesüra temaba jenjang nung asayaba asayatem shirnok yirur aliba nungi meyipa arur asayar parnok atema mekazüka toktsür.

"Iba ya drill ka masü," ta küm

FIFA WC: Germany, Japan, Netherlands nungeri pei tata asaya kokogo

Aami/June 21, 2026 (Agencies): FIFA World Cup 2026 nung Deobarnü Toronto Stadium nung Germany-i goal ka agi Ivory Coast mekoki aliba nungi meyipa tur asaya kokogo.

Asaya nung Franck Kessie-i asaya mezüngbuba shilem nung Ivory Coast atema mezüngbuba goal idaktsü, ajisüaka Denis Undav substitute ama aitba sülen pai Germany atema goal ana idakja parnoki asaya akok.

Asaya mezüngbuba shilem nung Germany goal anasa asayatem meyoktepa asayaba sülen Kessie-i tia ka-a goal ka ya idaktsü. Asaya mezüngbuba shilem nung Germany atema Kai Havertz aser Pavlovich natia goal kaka idaktsü, saka offside asüba ajanga goal magi.

Iba sülen Julian Naglesmann-i Undav yok, shiba Curacao goal 7-1 agi akokba asaya nunga goal idaktsür liasü.

Arishi küm 29 tain Undav-i Germany atema minute 68buba nung mezüngbuba goal idaktsü aser mapang apuloktsür asayaba mapang tanabuba goal idakja parnoki asaya akok.

Tanga asaya ka nung Japan aser Tunisia na FIFA World Cup asaya 1000buba asaya ya Japan-i goal 4-0 agi kokogo aser parnok knockout round-i aitsü ana nung lir.

Asaya nung Ayase Ueda, Daichi Kamada aser Junya Ito nungeri Japan atema goal idakja parnoki asaya ayong ayonga akok aser Group F nung parnok Netherlands den kasasa point pezü nguoa lir.

Tunisia-i iba asaya makokba tetezü parnok asayamung nungi tsükoggo. Mezüngbuba asaya nung Sweden goal 5-1 agi makokba sülen parnok jenjang kanga mejungi aliba mapang nung ano Japan-a mekoki liasü.

Kasa asayamung nung Group F asaya tanga ka nung Netherlands-i goal 5-1 agi Sweden ayong ayonga kokogo.

Asaya nung FIFA World Cup puti otsü nung Netherlands nungi asayatem rongnung Brian Brobbey-i goal ana takaratiba idakja liasü. Pai minute 16 aser second 12 tsünga goal ana idakja liasü.

Iba sülen asaya tanabuba shilem nung Cody Gakpo-i goal ana idaktsü aser minute 89buba nung Crysencio Summerville-i Netherlands atema goal pongububa idakja parnoki asaya akok.

Netherlands pur tang FIFA World Cup asaya 14 nung khendanga tamakok mongui asaya arudar (penalty nung tamakok anguba medeni). Parnoki asaya teku akok aser pezü draw süa liasü.

Maneni Honibarnü Ecuador den asayaba mapang Curacao goalkeeper Eloy Room-i otsü tasen ka yanglua goal aitsü aliba aika kümzüka sülen parnoki tang mezüngbuba World Cup nung point ka ngutetogo. Iba asaya ya team anapronglai goal kaka danga magütsüteti tembanga liasü.

Germany goal 7-1 agi makokba sülen Curacao pur World Cup nung tanabuba asaya atema Kansas City-i ao, aser goalkeeper Eloy Room-i kanga junga asayaba ajanga parnok tamakoker rongnung maden.

Asaya ya Ecuador-i amokbanger asaya aser parnoki target nung ball 28 metsüoktsü, saka Miami FC goalkeeper yagi goal aitsü aliba ball 15 tashi kümzüka liasü. Pai ball 15 tashi kümzüka ya 1966 küm sülen World Cup asaya nung goal keeper kati ball timtiba kümzüka asütsü.

BILEMDANGANG

"Tenüngsang agütsüba ya ola ajak dang tanangba."